

DEN AMBIENTE

Espectacular..concierto di Lucky Dube.. "Together As One"

Fotos/Texto: Jan Poets



** Un publico grandisimo a goza pa locual nan a spera di e concierto di Lucky Dube, cual a resulta den un exito total diabierna anochi den Joe Laveist Sportpark.

For di inicio te na final e anochi aki tabata un exito. Basic One cu tabata e promenan pa habri e anochi, a presenta cu un show bon varia di halto nivel. Impresionante tabata nan parti di e show hunto cu algun miembronan di Popcorn-dancers, cual a cay na smaak di e publico.

Despues cu Basic One a sa di entretene e publico den nan forma master, a toca turno pa nos banda "The Creators" subi riba escenario, pa asina cumpli cu nan soño di realiza un CD live. Mester bisa cu "The Creators" tabata un digno representante di Aruba como un banda di reggae. Apesar cu nan a presenta un repertorio nobis nobis, di cual e publico no tabata conoce y cu no tabata facil pa un anochi grandi asina, toch "The Creators" a logra di sacudi e pub-

lico su curpa cu nan ritmo unico di reggae den e sabor tropical.

Por a compronde cu e grabacion a resulta den un exito y muy pronto esaki lo ta riba mercado. Despues porfin Lucky Dube a presenta dilanti e mahestuoso publico acompaña pa su tremendo banda musical. Den un palabra Lucky Dube su concierto tabata un espectacular. Lucky Dube a demostra di ta un artista humilde cu ta comunica cu su publico y ta pone su publico forma parti di su show. Na dado momento hasta el a hinca nos papiamento y pone e publico canta den un cancion di protesta pa loke ta trata pago di impuesto.. "HEY MR TAXMAN..UNDA NOS PLACA TA?"

Lucky Dube a duna e publico loke nan tabata merece. Di otro banda tambe mester duna palabranan di elogio pa e organizadornan Ochi Henriquez di Beach Bum y Carlos Jacobs, kendenan a traha hopi duro pa e logro grandi aki.



E escenario tabata unico, e sonido di Thunder & Lightning tabata perfecto, nos artistanan local y Lucky Dube a haya un trato ala mil maravilla cu un suculento plato

den back stage y mas importante e publico a sali hopi satisfecho..aunke mester bisa si, cu hopi no tabata desea di sali ta "zweef", pero nan no por a scapa di e huma cu tabata su-

pla den Joe Laveist Sportpark y tabata tin e publico "gancha gancha"..

Claro cu e organizadornan no tin ni arte ni parte den e problemanan di "zweef".